

MI TRABOU

Lès 2

Skritura ta duna instrukshon kla tokante trabou; instrukshon tantu pa gerente komo pa empleadonan. Ma e lès lo trata solamente ku loke Beibel ta bisa di responsabilidadat i aktitut di e trahadó.

MENTALIDAT BIBLIKO PA KU TRABOU

Hende tin diferente punto di bista pa ku trabou. Algun ta haña ku e ta un maldishon. Segun nan konsepto, hende ta riba mundu pa dibertí. Trabou ta un maldishon ku bo mester soportá pa finansiá e dibertishon. Si bo tin e aktitut aki pa ku trabou, e lo produsí frustrashon, kansansio, i desanimo.

Pa otronan, en kontraste, trabou ta un bendishon. Si bo tin e mentalidat ei, lo bo tin alegria i satesfakshon mirando ku bo esfuersonan ta kontribuí algu na bo komunidad.

Perspektiva di Beibel ta ku trabou ta un bendishon. Nunka tabata Dios Su intenshon pa hende sinta pornada. Asta ora hende tabata perfekto, promé ku nan a hasi piká, Dios a duna hende trabou. Kiko tabata Adam su trabou segun Génesis 2:15?

Pasobra hende a hasi piká, trabou a bira mas pisá. Lesa Génesis 3:17-19,23. Pues, trabou no tabata e maldishon pa piká.

Beibel ta eksaltá trabou. Kiko ta algun proposito pa trabou segun e siguiente tekstonan?

1 Timoteo 5:8 _____

Efesionan 4:28 _____

1 Korintionan 16:2 _____

NO TUR TRABOU TA ONRADO

Maske Beibel ta konsiderá trabou onrado, no tur trabou ta étiko. Ora Palabra di Dios ta kondená siertu ofishi òf siertu práktika komo piká, ta klaro ku e trabounan ei no ta onrado. Análisá e siguiente lista di trabounan i splika dikun e trabou ta bon òf malu:

diler di droga, prostituta, weiter, polis, traha na kasino, toka den banda, deurwaarder, fotógrafo, “bar tender”

Kisas analisando e lista aki bo a ripará ku algun trabou ta malu. En kontraste, otro profeshon no ta malu riba su mes. Sinembargu mester tene kuenta ku siertu peliger òf tentashon na e trabou ei.

DIOS SU INSTRUKSHON PA EMPLADONAN

Den e era ku Beibel a wòrdu skirbí, e konsepto di empleadonan no tabata tan konosí. Mas tantu tabatin esklabunan. Pero e instrukshon ku Dios a duna esklabunan ta aplikabel tambe pa empleadonan. Lesa e siguiente tekstonan, anto skirbi loke Dios ta eksigi di empleadonan kristian:

1. Malakias 1:6; 1 Timoteo 6:1 _____
2. Tito 2:9 ta menshoná tres kos. Lista nan den e òrdu korekto:
 - a. _____
Tin bes un empleado ta pensa ku e no tin ku someté na su doño di trabou pasobra e ta un hende ferfelu. Ma 1 Pedro 2:18 ta bisa ku e trahadó mester someté asta na un mèneder ku ta trabahoso.
 - b. _____
Hasi e trabou manera hefe ke; traha pa agrad' é.
 - c. _____
Ni na su kara, ni tras di su lomba!
3. Tito 2:10 _____

Na trabou tin hopi oportunitat pa hòrta. Ta klaro ku bo ta hòrta ora bo kohe kos na trabou bai kas ku n'e. Ma bo tambe por hòrta tempu (bati boka, lesa korant, kabishá, yega lat, bai tempran, èts.). Bo ta hòrta ora bo ta dañá propiedat di kompania, gasta di mas, usa outo di trabou pa diligensia personal, èts. Ta un echu ku un motibu prinsipal ku preisnan ta subi ta pa motibu di hòrtamentu di empleadonan!

4. Mateo 24:45-47 _____
Esaki tambe ta inkluí e idea pa sea konfiabel.
5. Proverbionan 10:4; 13:4 _____
6. Efesionan 6:6 _____
Hopi empleado tin tendensia di traha ora mèneder ta wak òf ta presente. Ma ora e no t'ei, nan ta sinta pornada.

PA KEN BO TA TRAHA?

Naturalmente bo ta traha pa doño di bo trabou. Pero Palabra di Dios ta indiká ku bo mester traha ku un otro mentalidat. Lesa Efesionan 6:5-7 i Kolosensenan 3:22-25. Segun e tekstonan aki, bo mester hasi bo trabou komo sifuera bo tabata traha pa ken?

Si bo ta kòrda e konsepto aki, e lo hasi un gran diferensia den e manera ku bo ta traha. Si bo tin e mentalidat ku bo ta traha pa agradá Dios, anto kasi sigur lo bo hasi máksimo esfuerso pa hasi bo trabou bon, asta ora ningun hende ta mira! Tantu e manera ku bo ta traha komo e produkto ku bo ta produsí lo ta di alta kalidat. Lesa 1 Timoteo 6:1 i Tito 2:9-10. Pakiko un empleado kristian mester ta ehemplar den e manera ku e ta traha?

Si bo ta un siguidó di Kristo, e manera ku bo ta traha—òf laga di traha—por dañá nòmber di Kristo. P’esei ta hopi importante pa traha di tal forma ku bo ta mantené un bon reputashon.

TEPNAN PA KONSIDERA

1. Si bo ta un kabayero bon di salú i bo no tin trabou, bo trabou ta pa buska trabou.
2. Si bo no ta kontentu ku e trabou ku bo tin, no kita for di e trabou sin evaluá bon promé e siguiente puntonan:
 - a. E trabou di bèrdat ta e problema, òf ta bo aktitut ku mester kambia?
 - b. Bo tin un historia negativo di bula di un trabou pa otro?
 - c. Si bo ta kita di e trabou aki, kon lo bo kubri bo gastunan? Bo ta sigur ku bo por haña un otro trabou?
3. Si bo ta un mama, bo promé responsabilidat ta pa ku bo famia. Si bo mester traha pafó di kas, preferíbel buska un trabou “part-time”, pa bo por dediká mas tempu pa bo famia.

TAREA PA KAS

1. Siña Kolosensenan 3:23 fo’i kabes.
2. Hasi un evaluashon personal di bo situashon di trabou.
3. Konta un persona kiko Kristo a hasi pa bo.
4. Sigui fiel ku bo tempu ku Dios—sikiera 15 minüt—tur dia.
5. Lesa e siguiente lès i yena e kontestanan.